



09972

明李應昇著

涇縣潘錫恩校

中外之憂未釋上下之志宜通敬矢微忱仰贊聖明勵精之

治疏

臣聞蘇軾有言天下之患非經營禍亂之足憂而養安無事之可畏夫果其無事也厝火未然處堂自快識者猶鯁鯁憂之況乎以養安無事之習居禍亂方興之會上淵默而聞聲下拱手以觀望巧者取富貴以去黠者微閃爍其間上下之交旣睽則憂患之來未可一二數也人君之尊豈高拱無言神明獨斷之謂哉如太陽之方升晶光注射則陰翳消如重門之洞開內外昭徹則邪曲屏旣使上下之交坦然可以相信而中外百執事竦然不敢自安清明之象固已在天下矣我皇上冲年踐祚恭儉性成垂裳觀恭已

乾坤正氣集

卷三百十九

一

之容講幄仰遜志之益明廷矢音於梧鳳干旄黃望於邱園麟批拂志者數見賜環狐假弄兵者一斥脫距我皇考憇几遺言望我皇上爲堯舜之主者眞堯舜之主矣而中外何以脊脊多故也奴酋驚伏方養其全力以叩關水蒲鴟張方合爲犄角以內訌紅夷之焰未撲東南可虞西虜之賞日增濫觴安極逃兵肆劫于畿輔而內地薦起妖萌窮民待盡于催敲而缺餉茫無實算逗遛習慣大將避難而不前法紀陵夷驕兵鼓譟而不問人人知其可憂而姑付之爲後憂皇上燕閒之際平旦之時試瞿然興念可憂乎不可憂乎黃扉濟濟卿寺攘攘督撫如傳舍之不停守令若飛鳧之偶集聖上以爲分憂之有人乎無人乎處處添官日日會議覆疏衍成故套嚴旨等爲空言皇上不先振竦其精神發皇其志氣羣臣孰肯執法任怨以破情面之世界者且朝講之際畫有常儀諸



大臣卽有懷欲吐亦不敢逆探所疑嘗試瀆聽惟皇上霽顏怡神慮懷訪問安攘何爲長策兵食何爲實著或聖意之所偶經或時事之所偶觸或商前代之興亡或攷本朝之家法令其從容措思反覆開陳不以天縱神明輕加辯詰倘倉卒不盡所懷退而補牘入告如此則諸大臣將日夜焦思以備顧問中外諸臣不敢不竭力從事以副任使精神一振紀綱自飭皇上宵旰之憂庶可釋乎皇上勿謂天子以淵默爲神明不可以輕有言而徒託之傳宣也祖宗時有早午晚三朝尤時御便殿諮訪時政英宗日召大學士李賢面決政務孝宗日召尙書劉大夏諮詢密謀但使可否相濟何妨用舍之易人若止高下在心必羣疑之滿腹今皇上清明在躬太阿在握正治象方新之際然一日二日萬幾寧無有聖志先定而大臣不敢執爭成命一頒而諍臣莫能回聽者書曰稽於衆

乾坤正氣集

卷三百十九

二

舍已從人曰木從繩則正后從諫則聖皇上以天下爲心見其艱難而不見其易見其憂患而不見其安兢兢業業轉圜止輦則天地祖宗實式憑之而何患乎中外之多故哉愚臣入告之初不敢撫拾瑣事敬以憂危之言進唯聖明俯賜採擇天下幸甚臣愚幸甚臣無任激切待命之至天啟三年九月二十九日十月初二日奉聖旨知道了該部知道

治法治人交敝亟議清釐以祈聖斷疏

臣惟天下之治人與法二者而已任法在于信法而任人在于擇人人愈多則法愈玩法愈煩則人愈竊故衆人紛之不如一人執之借口破格以廣開冒倖之門不如恪守舊章而精求核實之用也往者神祖之季閔惜聲靈凋枯物象黯然如冬迨我皇考新政陽春乍回皇上解澤旁流太和布護其在今日亟需烈日秋霜乃



濫觴之流迄無底止卽起廢一端薰蕕並進兩寺臣恥討保之名  
至發憤以去亦足歎也夫祖宗治法犁然備具豈患官少哉皇上  
振紀綱則片紙如霆大臣破情面則千里運掌臺諫任糾彈則百  
司飲冰今動議添官爲人營窟紛紜遷調名實乖張自登萊添巡  
撫而盜餉費餉百餘萬添招練監軍而冒費又十餘萬他若淮海  
之招買兩淮之疏理遼蜀之贊畫前後侵糜亦各數十萬關城將  
領如蠖腹裏欽依遍地而剝軍費糧又不知幾十萬添置總督祇  
增議論之紛紛添註京堂日見謾罵之擾擾樞貳添設矣幾曾慷  
慨以行邊司空添設矣幾曾節省以儲器總兵添設數人矣祇見  
工媒孽而縱逋逃禮兵司屬添註二三十員矣誰是儲邊材而精  
典禮甚者濫開邊俸捷徑然灰則吏治日壞矣白衣攘臂邪人入  
幕則奸弁充斥矣使新設者而盡如畢自嚴之轉餉李邦華之飾  
乾坤正氣集

卷三百十九

三

兵董應舉之屯田毛文龍之牽制亦何不可而無如空耗民脂大  
壞名器至問當關之虎豹又久勞席上之夔龍嗟嗟何羶地偏多  
才夾袋遂成市也臣愚以爲可斷自聖心一切報罷倘謂時勢稍  
難革弊有漸則卿寺添註之缺先裁三之一以爲明年盡停之地  
可乎改設守備盡革新銜而從前濫給咨札悉行撫按追而焚之  
可乎事下部曹十九寢閣則該科註銷每月奏繳以嚴糾核可乎  
驕兵倡亂必有發縱則懸示定典明正領兵將官之誅可乎錦衣  
旗尉半歸權要虛名冒糧則差官巡視如京營之例可乎衛官襲  
替比試不嚴穢濫已極則姑停借職省虛糜之餉可乎將領蠶食  
逃兵不報私募乞兒半分其餉則力汰千總百把而歸伊團操可  
乎窮民蔽比號哭滿庭奸胥侵欺福堂安坐則侵盜邊腹四百兩  
以上眞犯死罪之例炤舊申明可乎才力不及無妨改調若貪殘



幾至貫盈糾參特議降處墨吏破甑如鷹思攫則著爲定例勿陞京外府推官及知州知縣以防其肆虐可乎凡今積弊固不止此然使外庭無倖竇則何人敢覬私恩諸臣敢執法則何地不可破柱伏乞敕下該部立限覆奏可行者明白施行宜止者斬絕停止毋悠悠泛泛以塞責毋混混蒙蒙以消沉共滌肺腸各破情面爲皇上惜名器爲皇上守紀綱則俘逆奴而搗水藺可計日俟也統惟聖明垂察焉天啟三年十月十九日二十二日奉聖旨該部知道

公論久已誅心大臣不宜掩耳謹指實直糾懇乞斷以折邪  
萌疏

臣惟治亂之關先辨邪正而消長之數係于大臣大臣之道不同要以是非明白進退有禮重廉恥而輕爵祿畏清議而惜紀綱則  
乾坤正氣集 卷三十九 四

庶幾問心無愧焉若患得患失反覆播弄始欲巧發其辣手繼乃妙隱其深機小人引爲奧主而無言君子刺其肺肝而不應厭然之態臣實恥之而況此方晝伏彼復夜行且交出以亂清明之治詎可不早折之乎方今衆正彈冠名賢布列而范得志突犯公惡南北交參夫得志走狗耳卽何熊祥與有發踪之功不免猖狂去後然其明明直認猶是顯惡可寬獨有不畏人言陰窺密伺如得志原疏所云新憲臣欲問豺狼而掣其肘者新憲臣何人固王永光是也永光生平不必具論就其兩三年來以指摘之身混登庸之列方借徑而南巧占風于廷尉俄營遷以北躡賞功之尚書旣心雄于主察則自北改南復智短于熱中又借差營北仁去乍來若梁上之燕望左望右如登龍之商此種行藏宜爲得志臭味且堂堂憲長澄汰百僚使臺中果有豺狼而掣肘不問是庸輒也使



謬以鳴鳳爲豺狼而挾私顛倒是邪誣也使原無豺狼本無孽肘而坐受惡孽曹郎之餘唾至今默默無言是聾聵也三者永光何居焉識者謂其援北道諮訪之例實爲下石之謀又欲開內轉管計之端將爲年例之地伎倆雖巧聖旨不行嘻亦可謂心勞日拙矣半年以來譏刺紛紛佯若不知任人笑罵試問臺省諸疏或云挑激或云逢迎或云有憑而聞者指歸在何人也又試問南臺諸疏或云有小人焉誘之使言主持之使言恐之使不得言或云始而旁觀指點繼之當局提呼其害鉅于得志罪浮于得志者指歸又在何人也然猶可借熊祥以自解也而近有爲之黠穴者云熊祥土木形骸其中有絡口穿鼻之人借之爲用而又有爲之寫炤者云快志于發踪鷹犬之得計而輿論共非潛消暗裡之機關永光試思諸臣之不直糾其名者畏之耶愧之耶誅心之法耶隱

乾坤正氣集

卷三十九

五

惡之意耶旣不敢張膽而自明又不知息機以引避邪謀已破猶巧閃于半陰半陽之間衆矢共攢尙匿影于若遠若近之地此真好官之利根而掩耳之妙策也其何以伸眉昂首居風紀之任爲南臺諸御史之表率乎乃若刑部右侍郎牛應元者撫頤饒有穢聲廷尉無一善狀借南躡北同此法門老病龍鍾支離顛倒旣已貽羞月旦詎可再入爽鳩此又當早自引決以全晚節者也臣職在觸邪罔知顧忌統祈斷自宸衷明白處分母使其依回蒙面則國是明而邪焰息矣臣無任激切待命之至天啟三年閏十月十三日十六日奉聖旨范得志事跡已明何又牽引深求王永光并牛應元各有才品且卿貳大臣不得輕行指摘有傷大體該部知道

強賊慘殺六命緝獲鞫審已真乞赦下法司正法并查參未



事官員以懲疎玩以雪冤憤疏

十一月二十六日據管理靖恭坊副指揮武紹文呈據一舖總甲曹奎報稱於本月二十五日酉時分有地方住人許國熙叫知說稱於二十二日往安定門蕭家看書二十五日未時回家見大門半開進內叫人不應止見妻李氏二歲男八哥三歲女大姐奶子馮氏使女會玉梅花男婦六口不知時候被人殺打身死理合報知等情到臣臣一見之不勝驚駭隨批男婦六口一時被殺非仇卽盜眞地方一大變也但事經三日大門半開地方鄰佑何以全不覺察死者見殺之時寧無呼號之慘安得盡云充耳不聞耶仰司立刻詳審根因相驗屍傷并行該坊速緝兇犯以憑題參去後二十七日據該司呈報相驗得李氏刀傷三處食氣額俱斷兩手腕有藍絹線帶拴緊兩脚腕有黑絨繩拴緊二歲子八哥三歲女乾坤正氣集

卷三百九

六

大姐俱鐵錘傷奶子馮氏刀傷二處使女梅花刀傷四處使婦會玉刀傷二處兇器刀一把鐵錘一箇鐵通條一根俱有血痕網縛李氏手足繩二條帶一條又據許國熙開具失單首告該臣先將鄰佑總甲人等究治外隨據該坊官武紹文呈報捉獲得張二張七徐九張鬍子四名押解到臣當卽審據張二供稱原在許國熙家服役改名許其本年十月十三日事犯責逐卽投兄張七家同徐九商議行劫張七說人只有一死不要怕遂聚集徐九張鬍子各穿乞丐破衣于二十二日起更時分張二先到門首見會玉在門前潑水就問家主可在會玉回稱不在張二隨暗跟會玉先進各犯一齊跟入徐九先將會玉用鐵錘打死張鬍子用黑繩網縛李氏手足將刀殺死又進奶子房內張七將鐵通條刺眼砍死徐九張鬍子張七將八哥大姐鐵錘打死張鬍子張七將梅花殺死



進庫房劫了衣服首飾分散跑走張七供稱進去報仇徐九供稱張二素與李麻子相厚偏不報出張二方供李麻子同殺李氏口詞在卷隨即批發兵馬司再行詳鞫追賊并卽拿李麻子速解屢次嚴催于十二月初三日拿獲李麻子招有先穿破衣在家差人起取于本月初四日連人呈解到臣該臣覆驗李麻子破衣血點淋漓數處張七身穿青綿衣前幅裏面亦有血跡李麻子已俛首甘誅各犯口詞與前無異獨原得贓物支吾變換復行設法訊鞫供報贓案明白除卽行司起取外該臣看得近來盜賊之多極矣小者鼠竊大者雄行然未有戕殺一家多命如此之慘者也劫殺在黑夜責在捕營而該營把總謬云不知時分旣已遁矣殺人三日大門半開寂無一人覺察則該坊官所司何事而六命被殺號呼不應鄰佑豈盡充耳不聞互相掩匿成何法紀及獲張二口供

乾坤正氣集

卷三百十九

七

殺人光景與臥屍之地一一如覩及再獲李麻子而血衣出矣血衣破衲正與張二所供穿花子衣之言合且血跡淋漓腥穢猶在而張七之衣謬云搗指所滴則何以不在胸袖而在夾裡且凝積之痕寧兩三日間所染哉本犯一到卽供了無隱匿徐九初詞惟以張二不報李麻子爲恨此皆鐵案也兇犯就擒冤魂少慰所應勅下法司速審正法其把總張國勳實放番役一任大盜之縱橫支吾隱匿不顧怨鬼之夜哭該坊副指揮武紹文中夜卽可卸罪三日云何罔聞明明巡緝之疏安免曠職之罰但捉獲各犯皆繇本官功過相準視張國勳有間伏乞明旨分別罰治以爲地方疎玩之戒抑臣猶有說焉夜巡番役額設不少無奈捕官知索常例不復稽查雇覓乞兒在官員往來之所聊應故事未入二更俄已散去三月以來失事者屢屢見告矣十月十三日則有田雲崗被



賊截劫傷重以死十一月初四日夜則有劉應元之被劫十八夜則有王加玉之被劫屢行把總婁尙武比緝查無一獲都城之內劫盜縱橫亦何用巡捕爲哉并祈敕下該部大加懲創則人心知警而地方少安矣天啟三年十二月初五月初八日奉聖旨張國勳已有旨參處武紹文著罰俸三箇月其屢次失事捕官都著參來懲治該部知道

敬循職掌廣察吏恤民之議以禱萬一疏

臣巡視以來兢兢自矢三月于茲竊自思念爲國家惜財則內之一當外之三爲國家清弊惠民則內之毫髮當外之尋丈何者轉漕之粟率三石致一首善之地四方觀化焉不可以微忽也臣差所兼攝者有存恤有鹽法其順天府與大興縣衙門設在地方事多關切故臣同官先後巡視者各有條議允行或端有未竟可以

乾坤正氣集

卷三十九

八

觸類引伸或局有遁更不妨審時通變姑舉一二見之所及者申而廣之如七十七衛所吏役閑曹冷署替身冒糧臣同官張應辰議欲盡裁其缺臣同官吳之仁科臣賴良佐有酌裁令史鎮撫司工房吏之議歲省太倉粟三千六百餘石豈謂餘缺必不可裁哉去之以漸則人不驚守之以經則事不廢今職辦事公署吏役呈參大半包雇該衛聞寂絕少文移且參票十九改撥眞僞茫無可據如謂舊例宜仍則吏部不新裁各衙門厯事監生乎權事理之中爲併省之法竊謂衛所六房吏役可以吏兼禮以戶兼工以兵兼刑則併裁禮刑工缺總計一百五十餘人歲可省月糧一千八百四十餘石當國家匱乏之時尙亦捐滴之助其收參在裁缺之前者乃炤前議聽其告假回籍滿日赴銷准作實歷起送至各吏告改衛缺封司必按月移文知會然後收參不得僅以硃筆批改



致滋弊竇此一議也兩縣改選甲科店禁嚴行禁治臣同官吳牲  
條議業奉明旨今改選未見覆行且宛平久以衙官署印與店禁  
私繫者紛紛見告么膺小吏爭訟微情不足以辱白簡但經告發  
盡法枷究而向因大京兆久缺督率無人遂有如簡較何孔修之  
誑騙多金硃票取貨者除臣徑行追斷外總以府縣領佐不屬五  
城故敢冒禁受詞恣睢無忌竊謂宛平縣設在中兵馬司當兼屬  
該城御史順天府首領及大興縣當兼屬臣差炤依兵馬例考察  
開註賢否違者徑行提參則受詞店禁之弊自懾息不敢犯至兩  
縣正官速議改選甲科如正官偶缺必委府佐署掌勿委衙官此  
一議也硝必益淨入京不許影射夾帶以壞鹽禁先經臣同官畢  
佐周條議奉旨部覆允行而近日工部司官又因益硝之費欲將  
十萬三千餘鹽給票發賣臣恪奉明旨不敢徇情已行兵馬司盤

乾坤正氣集

卷三十一

九

驗官賣除將價銀給舖戶十分之二以酬其守候之勞外尙可得  
價五百餘兩又先經臣同官吳之仁批賣過銀一百三十餘兩貯  
存司庫臣仰體皇上憫念貧民之心已經行司將前銀另項收貯  
置備棺木每具議價三錢五分仍用火烙印記以防侵換之弊凡  
貧民死而無告者官給一具并擡埋之費五分責令總甲及看守  
義塚僧人編號插記以備稽查夫掩骼埋胔王政所先澤及枯骨  
皇仁斯大乞敕各城設處依例施行至貧民入冬設廠煮粥分給  
衲衣儘可免于啼號惟煖坊甲頭多勒宿錢所以哀呼滿路臣已  
令司坊備行查勘籍名在官似應量給薪資禁其勒索使貧民夜  
有所歸似亦可以弭盜臣同官宋師襄近議周恤貧民者此又一  
議也臣愚無他諤巧不過前人已行之言立法亦非新奇不過職  
掌可行之事但爲國家省得一粒亦屬民脂清得一弊亦屬民困



其瑣屑無奇未暇計也雖然糧則省矣戶部管倉主事固多賢者如曹履吉田時春之節省清釐恐不多見若以苦心節省之餘而供胥輩碩鼠之腹盤驗不明收支不實則不如衆分之爲愈也合無俟工部節慎庫之意凡舊額應支新經裁節者各倉別立一版另項收貯以備不虞之需新陳通融別無缺額歲終具冊奏繳庶幾實得節省之用敢因裁月糧之議而併及之伏惟聖明採擇敕下部院覆議施行天啟三年十二月初六日初九日奉聖旨該部酌議具覆

邪臣供吐已明公論是非難掩謹再疏糾駁以聽聖裁疏

臣前見范得志以應察之人仇主察之官南北交章參劾而主謀之何熊祥至一疏自供彈文乃及其閃爍藏頭之王永光但見微刺不聞顯糾遂借差營北熱中播壘譬如炤案已懸猶敢揚揚都

乾坤正氣集

卷三十九

十

事故具疏糾之并爲刑部侍郎牛應元劾在得之戒奉聖旨范得志事跡已明何又牽引深求王永光并牛應元各有才品且卿貳大臣不得輕行指摘有傷大體該部知道欽此夫明旨謂指摘有傷大體非欲臣緘默以存大體也二臣如有心胸便當愧死況應元哆口名節爲重臣亦可付不言至永光一疏稱病計其時日應已見臣之疏而佯爲不知徐圖布算昨始再疏申辯俛首自供不知其兩月間幾許商量纔敢出疏而臣固逆知其不能諱也此亦可以見臣之非牽引深求矣獨是認聾瞶而不及邪誣且御巧營而謬附公論旣已躲身無路遂爾張牙噬人如云御史王允成南中饒有物議先欲察處則議論不一繼開年例則北部不行若得志之所謂掣肘者眞掣肘也此種密謀惟永光與何熊祥知之得志不過冷局曹郎不關黜陟大柄假非中宵入幕何以能窺其肺



肝而代之發憤哉查永光揭中之事卽係得志疏中之詞此外不聞一語異同何以合若符節應若形響且使其事眞也正宜明參不宜暗揭其事非也處旣不可例轉何名且永光之所執而是也秦山臧之而不動豈可聽行止于人其所執而非也已方有嘔喘不欲上聞之心何以欲人慷慨代行殺人之事臣前疏所云欲援北道考察事例蓋其殺機久動幸銓憲二臣之不從其言耳永光不感其相成而又嗾嗾乎臣豈不知御史不肖應聽臺長處分但必御史眞不肖而後可處亦必臺長賢而後可處御史之不肖若允成與李希孔建白錚錚南北號稱賢者得志疏出一時公論共爲不平此豈可以聲音笑貌得之豈永光之所謂不肖者正以其建白之錚錚也耶今允成去矣希孔鬱鬱死矣永光之恨尙未快于心歟且永光自視何如人哉朱敬循以閣臣朱賡之子從禮部

耶中而調吏部是何等薰灼永光以敬循之同門乞憐依附鑽入吏曹竟謀撫越與之首尾者數年是何等巧營長垣令孔榮宗關說不行扼之使去士民攀轅臥轍者兩月舊按臣以大力不容姑謝士民之口是何等居鄉威力而猶揚揚然曰參處御史是其職掌也是當年都御史陳炯參御史趙應元以媚江陵之故智也嗟乎狼當道而蘭是鋤鬼張弧而鳳已冥小人之禍烈于猛火況以南臺清議之地而邪臣明踞其上何怪考選南臺者厭薄而反唇也哉臣參列言路大體當存大好亦當去故再爲皇上別白一言凡大臣之品必如臣前疏所云是非明白進退有禮者乃可無愧否則謂之位高勢重則可若品之一字臣亦未敢輕以許人也臣草疏已畢見永光之疏已奉明旨仰見聖明之勇于去好而邪正是非之辨有不可因其一去而遂默默者統惟聖明裁察臣曷勝



惶悚待命之至天啟三年十二月二十二日二十五日奉聖旨王永光已准告病不必深求該部知道

撫時直發狂愚觸事略商補救以備聖明採擇疏

臣惟治天下者必有精華果銳之氣以呼吸而通天下則權立而勢尊夫是氣者何也賞罰之用是也天下何嘗一日無賞罰而狐鼠有據囊錢不靈跋鱓之極乃遂至于痿痺而不可救今天下之勢何以異此蓋天下有三患一曰夷狄吮背之患二曰盜賊肘腋之患三曰小人腹心之患三患不已乃有三病邪氣王而元氣削則病內元氣削而神氣盡則病外庸醫四出參黃之劑亂投補其邪而伐其元則病醫是三病者與三患相終始何以明其然也夫禮義廉恥國之四維今情面重者封疆輕私人重者君父輕官爵重者倫義輕行如鬼蜮言作風波四維不張形存心死故曰病在

乾坤正氣集

卷三十九

三

內人土財用立國之本今妖黨一呼響動王孫妄作狐鳴將軍夢斷于三韓太倉倒囊而一洗思亂有心恢復無計本未俱喪手足不仁故曰病在外治病之方審其標本劑其緩急今急黔卽捐楚以子黔急奴卽散天下以備奴加派慘于剝肉徵調極于沸羹睥睨草澤輒借鷹鷂以代驅剽掠都門轉聚虎狼以自衛乃至金繒媚虜任其殺將以吞聲甚而竊國者王竟借保結以賞亂譬如一局而奕者數人一室而鬪者數挺醫不以除病而反以病試醫幾何不喪于庸醫之手故曰病在醫嗟嗟天下原非疢痼之疾也而庸醫爲之岌岌乎有不可爲之勢者何也治天下之有賞罰猶醫之有針砭賞罰不明則小人日肆針砭不施則二豎不去數年以來二豎之患不可謂不深矣皇上試問罪璫遣而嫖書入者何人馬上催而三路敗者何人中樞執拘而經撫受敗者何人貪殘激



變而貽患黔蜀者何人賄脫盜庫表裏爲奸而一網善類者何人此不知斷送幾許封疆盜騙幾許官餉殘殺幾許無辜赤子從未一申嘗憲傷彼毫毛所幸天牖聖心劉朝斥死然天下之爲劉朝者方衆而賞罰之倒置者尙多逆黨漏網不問母乃以護紅丸之故護風癩罪樞濫賞無章毋乃以輕封疆之故輕爵癘績奏金城之趙率教幾蒙捕虜之誅而萬有字何以責欵議敘力爭國本之何士晉且吝援默之賞而袁可立何以安坐加銜內臣之癩囊滿志矣而轉移愈難坐歎直臣之鋼老成之拂衣屢見矣而慰畱非據養成頑鈍之風尤可異者高啟愚穢骨久沉突爲昭雪試思冲主任上垂簾尙不忍言況權臣在朝禪受是何題目執紼之巡撫力恨玷我名山媚竈之考官安得并翻公案狂瀾一倒誰不波靡于是新妖四出伏莽漸興或勢若負嵎巧提脈絡或謀成捲土密

乾坤正氣集

卷三十九

三

布機關誰謂死灰不然正恐百足未已而又有安身無計入室挑戈暮景方濃望門搖尾何怪乎譚謙益之欺罔朝廷楊紹震之混淆蘭艾趙會祖劉繼禮之積穢見糾公然反乞陞差也哉長安道上半視彈墨爲飄風小人聚族不免鼓掌而竊笑豈非止輦之風遠故避驄之氣哀耶皇上志氣清明聽覽周徹卽言官或有觸忤聖德每見優容獨是齒及路馬每承詰責而邪臣引去批答敷衍風采不揚至甘立仗不鳴之說啗啞日甚誰無轉喉觸譖之憂徒瑣事之條陳亦補苴之何益循此以往容容多福安得淮南寢謀如汲黯豺狼斂跡如張綱者乎蘇軾有言奸臣之始以臺諫折之而有餘及其旣成以干戈取之而不足養猶捕鼠畜犬防奸皆善喻也故臣愚以爲夷狄盜賊之患實胚胎于小人而言路之設所以決賞罰之壅而疏其滯彼皇皇于夷狄盜賊而用小人以求濟



是飲鴆以却病也且是二者原未至于不可爲我操其重則其勢自輕操縱得宜則勢常在我奴之不趨虜穴也彼亦慮爲宰賽也畏奴之虛聲受虜之實禍歟敗增賞曲意彌縫虜飽而驕後憂方大矧李侗身負篡逆之罪虛託效順之名萬一倚信保結明受其欺輕遣卑官貪鄙辱國彼坐邀其封爵我難責以勤王聲實無憑義利交喪不能自立何以平奴今關門之事恃有樞輔用奇用正默壯我社稷之靈因地因人固結以忠義之膽倘謂珠桂可念風鶴易驚則分一二萬兵駐永平爲後勁省運餉欸虜之費以廣投醪挾纊之恩撫道察芻粟之剋侵大將同士卒之甘苦軍心一固關門自安何至一聞警輒發家眷去關以爲民望哉盜之肆行也兵爲盜藪也況攻以賄成官實誨盜緝獲元寶之贓竟出曹郎之署而縱兵肆掠萬邦乎噴有頌言謂宜責令移營城外戮力自明

乾坤正氣集

卷三十九

十四

務擒鄆縣盜魁以見練兵實用更巡行通州高密店及涿州良鄉一帶近畿地方專務逐捕流賊招撫逃兵大開自首之門重懸捕盜之賞倣虞詡三料募士之意收其豪以爲用至三空四盡民心已離獨有節省一法可以搜抵加派乃十庫織造監局倉場一切付之不可問卽會議碩畫如臣堂官鄭三俊科臣解學龍二疏亦復久束高閣新舊交徵挺而走險吳楚之交漸聞呼嘯計惟專督新欠而泰昌以前舊逋盡行停免貪官猾吏巧躡無名民心猶可收拾何至掉臂而去弄兵潢池哉若夫小人者其勢旣根株不斷其途又錯出多門卽如事例之設本爲言利今枉尋直尺兩部爭言減價名器愈賤墨吏愈多狡僞者空手鑽入劾勞儒士躡取兩殿之銜日糜大官之俸而甚者陞廕濫觴任子如織先臣李夢陽所謂黜其父而陟其子黜其祖而陟其孫薰蕕不分顛倒莫甚謂



宜通查四年來得罪封疆公論共棄如張鶴鳴黃克纘之類停其  
恩廕以示勸懲而未也明王賞諫諤乃昌補闕拾遺官府一體  
人止問其賢不肖何問大臣小臣事止問其是非何問眼前過去  
白簡原非虛設皂囊豈屬空懸若一言遂錮終身言路寧不卷舌  
今抗疏綱常者路阻黃扉教人忠孝者身歸絳野執法擊邪者白  
衣高臥滌丹閣寺者青史空香劉朝譴死而抄參者削藉不返張  
鶴鳴罷斥而糾彈者環召無期忠臣之藁葬幸已推恩而特表孤  
忠者奚獨遐棄詹事之協理幾于充棟而並推鳴鳳者反謂不祥  
鬱極而通實在元輔試觀添註之得請可知誠足動天且觀雷憲  
之轉圜益見聖人無我倘賜環之典一行正人之氣日旺將負嵎  
者斂爪而捲土者灰心是則防小人之要而方今對症之藥乎抑  
臣猶有說焉君心者治亂之源源之既清流于何有聖德冲年正

精華果銳之氣充周有餘之日不患睿斷之不日開第患神明之  
不日濯願于深宮燕閒之暇澄心靜慮以思維四方之艱難左圖  
右史以鑒觀前代之善敗批覽章奏必辨其邪正之歸出入起居  
必謹于逸遊之戒獨出乎羣陰之上常立于無過之途志氣如神  
賞罰不亂則大臣效引燭焚詔之誼羣臣矢靖共爾位之心小人  
之患見明自消夷狄盜賊之憂于羽可格所謂堯舜通天下爲一  
身何虛扁之足喻哉狂瞽之愚倘有可採伏惟聖明寬其斧鉞之  
誅幸甚天啟四年正月十四日十七日奉聖旨這所奏詞多泛漫  
且朝辭議封事出權宜成命已頒不得復出異議該衙門知道

驚聞黔事愈切近憂乞聖明惕然深思早求長策疏

前者黔師告捷中外動色相慶謂坐可飲至獻俘再標銅柱而臣  
愚私竊過計夷性易動難安可以計破難以力爭也大軍弔伐罪



止渠魁當以招納爲先不在廣行殺戮今級以萬計玉石俱焚冤死狐悲自然之理近答按臣侯恂有云善後之宜人心爲本必使蠢蠢諸苗皆仰天朝威信而廓然無貪其土地之疑乃可以安反側而弭後患臣固慮有今日矣且孤軍貪利後勁無人賊方委其子女布其腹心誘我深入四面招援而我驕懷自愚津津于郡縣其地以生諸苗助逆之心安得而不敗嗟乎國家捐數十萬金錢殘數十萬生靈以博此虛聲之一捷而今已矣無將無兵無餉并無城守之民貴陽一塊土將復淪于腥羶爲遠左之續矣賊旣生獲三善納諸陷阱必且執以爲質以肆其要挾之求三善若慷慨捐軀賊知勢不兩立必且勾連諸部鼓行而入崇明之故穴爲今之計速命鄖撫蔡復一提兵直進以會督臣亟發帑金數萬付督餉臣邱兆麟往爲接濟仍命粵滇兩撫各發兵爲聲援而四川督

乾坤正氣集

卷三十九

去

臣朱燮元亟移駐重慶遵義之間以遏其封豕長蛇之勢臣同官傅宗龍志切請纓熟諸黔事亟宜就近議用以資其救焚拯溺之方若遷延格套議論不決待貴州陷而後圖之萬無及矣臣因是而思勝敗之數全在人心人心動搖則雖秦隋之富強祇供大澤之呼嘯今之內地在在寒心間山東平妖之後搜妖民遺產變價入官流民歸來不免驅逐進有妖黨之誅退無衣食之計千百爲羣大亂將作閩中紅夷忿我之誘其船而焚殺之也將搆倭夷與我爲難且奸弁誅而遠民蠢動于登萊徵調急而彭酉伺釁于三楚長興賊殺長吏東南孽孽未消所在地方不思招撫流移安輯百姓而邀功喜事馳騫而起至東昌府擒一王好賢而薊撫掩襲以爲功功賞滿天下而天下已亂矣望亟下手救數行宣戒撫按速圖消弭之法毋貽內地之憂臣又見邇年以來議論日多實算



則少羶戀日甚任事無人該部之題覆祇鋪張紙上之謨謀大家之營求盡講嚶京華之卿貳事本見行計非奇出而滋蔓申飭以亂視聽而冗文移安則狂奔危則匿影而四顧躊躇輒嘆才難而停啟事求一薊遠總督則難求一遼撫則又難今求一黔撫則又難之難乃至掩殺老穉黔人飲恨之張鶴鳴聲援廣布攘臂翻身譬若舉殺人之庸醫使再試膏肓之鋼疾勢必至陰砒陽鳩盡毒室人攫珍寶之藏而後已審如是則無關門者亦可復用敗壞遼事之人而秉國柄者亦可復用誤國亂政之人卽決桎梏破囹圄盡出大盜以居民上復何不可噫誤矣乞敕下該部發單九卿科道博訪堪任邊事之材各舉所知以備選擇但不許淆亂國是濫舉清議共棄流毒封疆之人該部必能虛公參酌不以舉者之力爲低昂但擇其舉主多者儲之夾袋或召而試之庶無臨事乏才

乾坤正氣集

卷三百九

七

之患蓋千慮之一如此伏惟聖明採擇施行天啟四年二月十四日十七日奉聖旨這奏內山東流民復業當確查酌給不得一槩驅逐撫按各官戒諭有司安輯百姓毋得生事邊功著通行申飭餘已有旨了該部知道

縷訴民隱仰動天心乞實行寬恤以固邦本疏

臣觀今之議者但知急財用而不暇急民生但知憂邊疆而不知憂內地地方加派之始在在重額取盈卽不毛之土求損絲毫司農慳不肯應及斂急民貧賊乘其隙川黔滇齊相繼告變所在題冊分給捐天下之半而又益以太倉之轉輸皇皇焉應之恐後然後知人心一去所得之不償所失也今四海之中稍畱寧字以供數百萬軍儲者九鼎一絲全在東南半壁向使東南有事卽欲問轉漕之粟豈可得哉故今日安天下之大機居莫如恤內地之民生



民生之憔悴極矣言興利而利未必可興不如且與之除害徭役繁重奸胥欺隱一害也長吏貪殘酷罰重耗二害也通家高訪株連誣陷三害也馬戶河夫破家蕩產四害也盜賊克斥邪教勾連五害也拋荒虛糧賠丁鬲欠六害也里甲修理糧長鋪辦七害也俗吏妨農非時勾比八害也白役下鄉乘船騎馬九害也勢力投占私債侵奪十害也又有五反國家設預備倉以爲民今僉糧里買穀以厲民而該部至欲括取平糶之半則郡國何以備水旱乎一反也祖制立保甲以弭盜今立汛地捕役以誨盜而議者尙申鄉兵召募之說則耒耜不盡化斬木乎二反也侵欺捱獄而扳指平民以完贓預放工食而搜徵民欠以抵解三反也懲貪無法而轉以王官進其階察吏怙終而仍予州縣肆其毒四反也詔書停格而丞尉硃票如飛訟師橫行而南院十詢九准五反也臣聞之

乾坤正氣集

卷三頁九

六

養馬者去其害馬此數者不去則民生之憔悴無有已時伏乞敕下該部通行撫按應禁革者禁革應清理者清理毋使貪墨長氣塌冗捱時而貧民嗷嗷日在水火以傷皇上平明之治若夫加派之害勢未能去者臣不敢言而又有灼然宜去者莫如積欠併徵之害今夫人日有百斤之擔疾病不支委積數日一旦舉而併肩之則立見其仆民方剜肉醫瘡完天啟見徵之不暇而能完萬歷年間之舊欠乎該部明知無益姑免參罰然朝廷旣未蠲除人戶日見追擾州縣猾吏喜于誅求營幹司府糧房一紙行催卽紛然出不僉差每牌賣錢數貫虎狼四出雞豚一空公家未獲絲毫胥役之腹已飽故蘇軾謂積欠之民爲縣胥食邑戶哀怨之氣上通于天大江南北連省通圻所在以地震告盜賊旣作水旱隨之倘復有徐鴻儒葉朗生史八舍陳鼎相之徒一呼而起實可寒心皇



上試思前項舊欠與其空掛虛名民不見德年年搭帳終無完期何如下數行之詔明示蠲免以感格天意收拾人心有不鼓舞終事以輸見徵者臣不信也所謂捐虛名而收實利者無過于此又近見吏部申飭考察署官不許徵糧可謂曲體民瘼第計吏往還少亦四月察處畱部銓補更遲且三冬收穫之際貧民亦可奉公轉盼春夏之交荒月詎能應手今四海多事議可從權不如查州縣正官官評無玷俸未及期者悉畱免覲早與題明免其數月之前營營于行李餽遺之費旣可資地方之撫循亦可省長安之書帕豈非安民生之切務哉臣愚目擊民困憂心如焚輒敢摭拾以告惟聖明采擇實見施行不以猥瑣棄之民生幸甚天啟四年三月十六日十九日奉聖旨恤民除害全在有司盡職著撫按官嚴行申飭仍不時糾察貪吏以示勸懲蠲免舊徵併畱免朝覲正官

乾坤正氣集

卷三十九

五

該部卽與議覆

敬陳保身之要以明修省之實疏

臣惟我皇上春秋鼎盛如日方升凡起居出入之際天地祖宗之靈實憑鑒之中外臣民方以多福多壽多男多女華封之祝乃昨者聖躬違和地一日三震臣竊懼焉臣聞古之聖王原不諱疾而日慎一日轉爲福基嘗攷周文王之八年寢疾五日而地動有司曰地之動爲人主也文王曰天之見妖以罰有罪我必有罪請改行其可免乎無幾疾止三代以來歷年享國之久未有如文王者也皇上風寒之感緣動而入則地亦以動應而畱神靜攝元和保固恭觀宵衣臨御玉音清亮諸臣欣欣喜色相告豈非文王改行之效哉顧猶不忘前戒明詔修省夫修莫切于修身省莫先于省心此其大者非臣下所能代而其至者又非臣下所敢言臣愚竊伏



而思之昔神祖冲年踐祚上有聖母孝定皇后維持調護迨萬歷七年患疹已愈猶躬視起居朝夕不離偶以夜飲失度譴責備至悔懼累日孔子曰父母惟其疾之憂蓋當時憂之如此其深而愛而勞之者如此其至也皇上子然深宮惟以天地爲父母維持謹告之事天地實代行父母之權地蓋有母道焉故數震以警悟皇上也人情當康強無恙未有不疎藥石之言者謂吾精盈氣壯壽命綿遠區區情欲戒傷不足深患及其風邪外侵藥石苦口然後憬然悔怵然戒知欲不可縱樂不可極故其人少而善病老必康寧何者衛生之經病中得力常情尙爾況天縱之聖明乎臣嘗伏讀祖訓有云凡吾平日持身之道無優伶近狎之失無酣歌夜飲之歡蓋我聖祖垂誠正心保身者親切如此伏願皇上思前日何以違豫則知後日所以凝和母謂體已康而足恃母謂災已過而

乾坤正氣集

卷三十九

二

可忘以臨朝御講之敬推之深宮燕閒之中以宣醫餌藥之心推之快意適觀之際屋漏儼日月之臨炤出入凜冰淵之在前使志氣清明精神強固以基萬壽無疆之慶則祈天永命之第一義也抑臣聞之兵者陰氣譬如毒藥猛獸不可狎也皇上居安慮危雷意武備意至深遠第宸居清嚴生氣所聚且宗廟社稷之靈在焉而銃砲喧雜震驚地脈詭詭之象地實應之似非所以安神靈而感和氣也攷之舊章旣所不載卽神祖故事曾一舉行而當時未及兩年旋即傳旨停罷且曰內外之分殆無常操之理皇上三復斯言可以油然而悟矣彼養生家頤葆太和必返視却聽凝神靜息今聖躬初豫神氣易驚奈何遽忘靜攝金鼓之聲如昨哉語曰忠言逆耳利于行良藥苦口利于病臣備員耳目忠愛微忱思之數日不能自已豈敢倣倖無罪亦庶幾乘勿藥之初未忘苦口之味



不至以規爲瑱也天啟四年三月十九日二十二日奉聖旨內操舊規多事戒備前已屢有旨了不得又來瀆奏該部知道

謹因熱審推廣至仁乞除法外之刑以明好生之德疏

頃見刑部都察院接出聖諭如今天氣暄熱兩法司并錦衣衛見監罪囚笞罪無干証的放了徒流以下便減等擬審發落重囚情可矜疑併枷號的都開寫來看欽此皇上仁心仁政率循舊章不愆不忘此誠死者肉白骨之時而生者起覆盆之日也臣見近日奉旨立枷罪犯纍纍皆爲僵鬼遺骸腐屍尙浮埋柳下方其悲呼沉痛慘于刀山熏灼支離毒於陷穽行道爲之隕涕異類爲之哀鳴天道好生鬼神降鑒皇上深居大內不見不聞倘車塵所經睿照所及臣知我皇上如天之仁必爲大禹下車之泣矣我國家仁厚開基律例損益一歸至當明罰救法之內惻然有哀憐無辜之

乾坤正氣集

卷三十九

三

心伏讀祖訓首章垂誠聖子神孫止守律與大誥並不許用鯨刺腓剝闡割之刑夫是五者蓋亦未至于死也尤不忍以肢體之傷殘致自新之無路況立枷之令本非死罪特用死法其荼楚慘口又死罪之所未有乎謹按律枷有三等死罪重不過二十五斤徒流二十斤杖十五斤止以書罪名于上號令示衆而已故曰枷號至于一百二十斤大枷例雖有之亦不輕用解者猶謂日枷夜放以全其生今枷至三百斤甚之立于赤日之下霜露之中兼以錐楚鍛鍊之後魂驚肉潰之餘三日而骨戰五日而水腫下注十日而血漬于肢節之間不半月而斃命矣昔齊宣不忍殺赫之牛孟軻以爲足王漢文感緹縈之意遂除肉刑唐太宗讀醫書言人之五臟繫于背遂除鞭背之刑二君皆以寬仁好生幾致刑措享國久遠政化隆盛臣願皇上特發惻隱之心自今爲始永除立枷之



例其罪不至死例應枷號者止炤常枷示聽法司平衡而斷決之不然彼待決諸囚至大逆不道凌遲絞斬尚熟審以求其生五年欽恤以求其生每歲朝審臨刑三覆奏以求其生卽生路旣窮一刀落地尙未若立枷者之荼苦累日求死不得也名若生之而反甚于死又何如坐以大辟猶得奄息于囹圄哉天地至仁惻然動念當不待臣言之畢若左右之臣與執法之吏以盛德事導皇上者請自此始天啟四年五月二十日二十三日奉聖旨立枷旣係舊制且經科道條陳不得借熱審槩請停止該部知道

罪璫巧於護身明主不宜分過謹直發其欺君之罪以仰祈  
聖斷疏

昨臣堂官左副都御史楊漣疏參東廠太監魏忠賢二十四大罪此非漣一人之私言通國之公言也通國之人畏忠賢甚于畏皇  
乾坤正氣集

卷三百十九

三

上故切齒不平搖手相戒漣獨冒死危論感悟聖心謂宜大奮乾剛立加斥逐以正其竊弄威福之辜忠賢亦應束身待罪以謝天下忠臣義士之口乃一疏乞憐溫旨先下羽翼四布謬曰孤臣忝睢無忌謬云忠赤不知誰爲代草以欺皇上者皇上因其不辯轉謂小心夫忠賢非不欲辯也干眞萬眞無可辯也干罪萬罪又不勝辯也忠賢不能自辯而皇上反代爲之辯則中旨眞可聽其僞傳乎閣臣眞可聽其愛立乎外廷眞可聽其交通乎老臣眞可聽其驅逐乎直臣眞可聽其禁錮乎生殺眞可聽其自操乎爵祿眞可聽其掌握乎奸細眞可聽其深藏乎兵柄眞可聽其在手乎出入眞可聽其僭擬乘輿乎臣知我皇上英明天縱此必非皇上之意也皇上特念舊勞不欲遽加顯斥而忠賢但招誘議動輒說親裁昨聞參疏到閣依然傳擬而明旨諄諄遂一一爲忠賢任過



夫忠賢何敢欺皇上至此乎且旣云任事過直矣事則忠賢任之而名則皇上受之忠赤者固如此乎臣嘗觀從來小人之禍其始莫不有小忠小信以固結其主之心根株旣深辣手乃露故夫不遠爲王振劉瑾者乃其深于爲王振劉瑾者也今皇上曲賜包荒明示寬大姑念其犬馬而反以蓄豺狼厚益其醇醴而輕于疎藥石譬之士庶之家有紀綱之僕日竊其主之財力以恣睢斂怨而日事左右之彌縫一旦有人焉盡告其事于主人不免念其奔走姑與優容然主雖不言而僕固已疑矣疑則思自全之計急則作危險之謀蕭牆之間寧無深患故忠賢不去則皇上不安而今日被論之忠賢不去則皇上愈不安臣爲皇上計莫如聽忠賢之引退以全其命而解其燭影之疑卽爲忠賢計亦莫如早自引決以釋中外之疑而乞帷蓋之賜不然皇上日爲忠賢作江海之流而

乾坤正氣集

卷三十九

三

忠賢日以其身供鳴鏑之射縱多方藉口百計防川鬼神忌盈物惡其上九廟之靈將必殛之况于忠臣義士請尙方之劍者哉嗟乎君側不清焉用彼相一時之爵位有盡千秋之青史難欺不欲爲劉韞謝遷者恐併不能爲李東陽倘畫策投歡不幾與焦芳同傳耶臣忝列言官不敢作寒蟬仗馬恃有聖明之鑒觸犯凶鋒死無所恨天啟四年六月初四日初七日奉聖旨已有屢旨如何又來瀆擾姑不究該部知道

懇乞聖明念死諫之臣作敢言之氣疏

臣聞唐魏徵對太宗有言願陛下俾臣爲良臣毋爲忠臣良臣稷契咎陶也忠臣龍逢比干也稷契咎陶荷美名而君都顯號龍逢比干嬰殊禍而喪國夷家唐宗魏徵可謂君臣相遇千載一時矣三復其言猶有餘痛皇上御極四載寬仁恭惠覃被臣工人仰



聖明天子近者盈廷請劍覓社難薰孤憤銷沉三光黯蝕原任工部郎中萬燦以陵工補牘遂觸震威然恭誦明旨一則曰從輕一則曰爲民仰見皇上聖明以爲燦之罪不至死杖亦必不至死意燦生出國門編氓原籍長爲皇上太平之民也而燦今死矣未報國恩先填溝壑六尺之孤繞膝八旬之母倚閭旅襯無歸遊魂戀闕臣僚飲泣道路咨嗟然無不共亮非出于皇上之心也彼時羣璫橫擊血亂神飛監杖張威傷痕甚重兼以倒拖逆拽蹴踏摧殘種種不支故至于此而令皇上損好生之德負殺諫臣之名臣故不暇爲萬燦寃而深爲皇上寃也且天下士大夫所以激昂奮發不能自己者獨念祖宗養士二百餘年禍在蕭牆且在旦夕故懷忠仗義感恩圖報耳而一言觸忤褻辱身死豈所以作忠而勸士哉夫緘口以待遷厚利也危言以招戮實禍也身死而天下悲其

乾坤正氣集

卷三十一

五

忠虛名也舍榮妻子肥身家之計而削影編戶取侮于鄉里小兒區區博此虛名饑不可食寒不可衣將焉用之况乎傷殘父母之遺體備諸楚毒以從龍逢比干于九原此魏徵所以不願爲忠臣也懸之以必死之法而求批鱗折檻之風雖賢者猶或難之若曰吾不用直言而可以致治則是剖心不亡腹誹不滅而惟言莫違孔子不以爲一言喪邦矣臣切願我皇上惻然與思瞿然動念也皇上元首也臣子其腹心手足也人非奴隸法非訊囚罪非死刑命非草芥廷杖重典殊失士心動杖一百尤不經見且以杖輕之故杖行刑之人是必欲衛士畏威立斃朝士于杖下而後快心也爲左右計則得矣聖心何以自白聖德寧不重傷耶直俟天心悔悟平旦與隣死者不可復生傷者不可復續而後問罪左右卹死錄孤嗟何及矣昨禁地失火天譴甚明心火蘊隆于下精侵感盪



于上御史之杖血方醒而祝融之烈焰旋作董仲舒曰罪在外者災外罪在內者災內可謂深切著明矣伏冀皇上因建言者之死覺借威者之非優容言官喜怒中節無致積威所劫人興遯思天怒而莫之敢告人怨而莫之敢言而皇上眞孤立于上也天啟四年七月十一日十四日奉聖旨已有旨了不必瀆擾該部知道

海內民窮已甚東省亂形可虞亟請乾斷處分以消彌大患

疏

慨自三韓發難轉餉征兵騷動天下不俟奴酋之來已岌岌乎有瓦解之勢蓋視夷狄爲動靜者亂民也其發也有待而視盜賊爲動靜者饑民也其發也無時從來內患非外患不作亂民非饑民不聚徐鴻儒麼曆左道乘兵潰民愁之日奮臂一呼從者數萬江南惡孽攘袂思起以觀徐兗之變顧事未舉而先敗者何也無饑

乾坤正氣集

卷三百十九

五

僅流離之可乘勢孤而黨散亦地方諸臣徒薪之效也天下之民豈誠好亂哉有加派矣又有額外之雜派急見征矣又急虛名之帶征千頭萬緒步步敲呼四盡三空人人離怨此方冒賞而希磨彼復頌德以稱功村墟塗哭守令誰肯關心狐嘯猿啼地方又思卸擔告饑告旱所在騷然江南巨浸稽天更數十年所未有空煩鄭俠之圖猶責轉漕之粟洵洵者未知死所母惑乎東省之再以亂告也臣嘗有驚聞黔事一疏謂該省流民遺產變價入官進有妖黨之誅退無衣食之計千百成羣大亂將作早已知有今日所望爲之撫臣者釋去邊幅相其寡會亂則剿之饑則撫之巡行鄒膝泗水之間急爲平定安集之計而奈何有泄泄從事一籌莫展如王惟儉者臣請就其言以折之據云兗郡草寇今餘兩月則坐視不爲不久矣據云一劫下橋集一劫界河驛且續有梁山頭之



劫西望塚集之劫則殃民不爲不酷矣問其賊勢之強弱則云多者言萬餘少者言二百而浪猜曰言二千者近是偵探茫如捕風問其制賊之機宜則云撫亦罪不撫亦罪勦亦罪不勦亦罪而謾請曰乞明定一局調處迄無成算夫兵機變于呼吸賊勢急于燎原廟堂不能遙度方欲問之封疆之臣乃地方無計支吾反以責歸罪之地臣誠不知其何心至守備黑大方斬殺六十餘級人傳以爲平民撫臣獨信爲賊忽而具疏報捷忽而發書追回種種說夢猜謎一味手忙腳亂皇上謂如此伎倆足以辦賊否乎臣非苛求于惟儉也臣所憂者漕河之咽喉一斷則京師危中原之烽火一傳則人心動况徐淮豐碭處處有人三吳饑民洵洵堪逞地當首尾之勢患切剝膚之形而惟儉方且以李在沐等將二歧山賊

乾坤正氣集

卷三百十九

三

趙散只有瓦渠一處蕩平指日告人是欲送賊出境以鄰爲壑也嗟乎直賊姑趕之使去平民或殺以爲功所謂勦法如斯而已趕賊過河禍忍言哉伏乞聖明乾斷責問惟儉何以縱賊至此賊當何日得平如其能在母他籍口如其不能請擇能者易之母以一人誤東省并以東省誤天下天啟四年八月二十七日二十八日奉聖旨這賊衆前後聚劫解散事情着撫按官據實奏報王惟儉着料理勦撫毋以牽制推諉界河驛路等處有無截阻并運河一帶嚴行道府各官加意防戢不得坐致疎虞該部知道

閣臣負罪愈驕謹平心參駁以折凶鋒疏

臣聞分莫嚴于君臣禮莫重于朝祭罪莫大于不敬此三者盡人而知之也大臣有罪席藁以待台諫執白簡隨其後其誅之則國之法也其赦之則君之仁也未有驕蹇不恭于前恣睢無忌于後



如大學士魏廣微者方其偃仰高臥不拜正朔迨至日中祭畢然後闖入廟門科臣以無禮糾之所謂自作之孽于人何尤哉皇上至仁旣已赦置不問而姑以敬慎二字示金錢愧心之義廣微杜門省愆亦應咋舌愧死而不意其因禮科諸臣之言悻悻託疾猖狂叫號若撫劍疾視以恐喝諸臣而關其舌者臣不知廣微品足以服天下乎才足以匡社稷乎抑軍旅之勞足以勒鼎彝乎三者無一焉所翹然自負者不過曰罪止失儀云耳夫行禮差錯始謂失儀謹按大明律失誤朝賀者笞四十祭享失誤者杖一百廣微宜何居焉可覩然復入中書之堂乎而一則曰違時再則曰違時臣聞孔子曰事君盡禮人以爲諂雖違衆吾從下孔子之違時者如此豈廣微之慢上無禮者爲是而時之戴星鵠立秦璋駿奔者反爲非乎國家設言官稱耳目近臣言及乘輿則天子改容事關

乾坤正氣集

卷三十九

七

廊廟則宰相待罪廣微之父嘗爲言官公正發憤得罪閣臣以去聲施至今廣微獨不念乎奈何比之路馬斥之此輩夫不與此輩爲伍者必另有一輩作緣方今聖天子在上賢公卿在下廣微有何疚心之事清夜抱慙微見指摘輒自張皇若十手十目之暴其隱也最可駭者身爲宰相固已位極人臣猶怏怏以不得好官爲恨奚忍更有他念而公然出此語以告之皇上是尙有人心尙有人臣禮乎伏乞皇上戒諭廣微釋敬慎之旨安臣子之分退讀父書保其家聲毋倚三窟與言官爲難庶上可以對聖明下可以對士大夫而異日亦可以見乃父子地下也天啟四年十月初七日初十日奉聖旨重大臣以尊朝廷關係國體這事屢旨已明何又借端輕侮且引用律條以後大小各官失誤朝參祭祀應否依此通行李應昇好生恣肆不諳大體本當重處念係言官姑從輕罰



俸一年該部知道

遵旨再行申飭以一法守以肅臺綱疏

本科代掌院孫老先  
生草

臣惟御史臺彈壓百察紀綱之所從出故曰肅曰貞言其嚴而不可犯一而不可紊也若游移錯亂本原之地先自蹈之何以澄清天下往臣瑋待罪憲府奉教于前臣孫丕揚備言數十年前臺綱之振飭爾時已大非其舊及臣家居數年蒙恩再入回視昔年又大非其舊矣累朝令甲炳如日星一番申飭又成故紙申飭之所偶及則奉以爲新模套數之所相沿遂頓忘其故典人各任意爲法而法不法卽守不守臣實鯁鯁焉懼是以有時局日異一疏修舉舊章以嚴飭必行望皇上伏蒙皇上采納亦以嚴飭必行屬臣等若停格典制卽在臣手是食言也臣不敢自食其言况敢悖皇上之明旨哉頃者差滿御史周邦基陳九疇各具疏告病奉有明

乾坤正氣集

卷三十九

七

旨都察院知道欽此隨發河南道查勘呈覆到院覆奉聖旨御史差滿考察回道原係舊例且新經申飭何得不遵周邦基等都不准告病該部知道欽此仰見皇上振紀綱警弛玩所以責成御史者甚至除御史周邦基陳九疇遵旨劄催到任外敢以臺綱所係者再一申明之先是巡按御史溫臯謨等各求寬限明旨概不准行今冢臣趙南星遵奉申飭謂寬限爲養俸之術急公乃拙宦之道至欲比于鷹鷂之擊乃趨起不前賢者不免臣是以有限外停俸之議以折其遷延養俸之思若寬限不得變爲告病自甘停俸作缺則或有不得已者然近年以來考察先後事例不一有覆准告病未題回道者有旣已告病仍題回道者其他諮訪稱職先題回道而後劄催到任者又不一人竊詳考察之法舊例重在報冊以考其職業之舉廢新例重在諮訪以稽其激揚之是非衆口僉



同公論難掩即使告病歸休亦無所容規避惟是受命而往竣事而還祖制不繇本院徑赴御前復命豈惟入告成事明臣子之恪覲揚無路之時而偃蹇方命分義謂何請自今考察回道俱定于御前復命之後違限兩月以上者遵炤會典參處其告病之禁向未申明然陰陽之患壯夫不免執掌馳驅昔人所嘆請自今各差御史患病如在地方則遵炤會典巡撫代題行本院勘實咨部題覆如已交代離任則遵炤京官患病事例具呈本院勘實代題不得徑自具奏臣等察其病勢之深淺原其時地之遠近酌量可否不敢徇情有託疾避事者從重參處其有眞病經臣等查實覆奏者乞皇上卽與允從以恤其私庶託疾者無所借口如此則法一而可守令出而必行臺綱無散亂之虞風紀有整肅之象所當申勸坤正氣集

卷三十一

五

飭以信明旨者也抑臣猶有說焉夫不肖者何知法法爲賢者繩也臣等爲國家培元氣執法之念常不勝其愛才而爲國家振紀綱愛才之心終不敢于執法願終以必行二字仰告之皇上而下列之諸御史使咸恪遵成典共襄盛治以免于戾臣實大幸惟聖明裁察天啟四年三月十九日二十二日奉聖旨卿振揚風紀修舉舊章前奏已悉這差滿復命考核及告病勘實代題等事俱依議行御史法官當爲朝廷守法何得先自違背還嚴行申飭務在必行有仍前不遵約卽行參處

申明憲紀大破積習以安民生疏

本科代掌院孫老先生草

臣等竊惟堯舜之治不過安民今天下之民已有釜魚挺鹿之勢所冀蝗魃不作虎冠未恣稍稍假息遊魂耳乃緣法度之頽靡遂致荆棘之滿路官守言責人相諉謝獨御史一官入則簪筆論議



出則持斧激揚此官舉其職則天下不難治也古道不行時情日  
錮身在局外每慷慨以除貪殘一入局中率因循而隨波蕩故巡  
方行事常不如其持議之初心及回道數時又漸忘其地方之所  
願蓋有下不能廢于朋友而上不可告君父入不覺移于妻孥而  
出無以謝百姓者則交際是也濫交際括贖緩臣瑋業一申戒而  
沉醉之後非冷水沃之不醒記曰君子之接如水小人之接如醴  
先輩交際止媿疎防卽萬歷中年俗猶近古沿至末年邪佞用事  
人寡而柄尊遂數十倍之今聖政已見清明奢儉尙猶不等每遇  
大計之年卽申餽遺之禁幾見輦而入者復輦而出哉結納旣廣  
衆力隨之貧者爲功名庇貪者亦爲功名貪者爲身家庇貪者亦  
爲身家長安之賄風不戢則外吏之盜行難除撫按之本源不澄  
則貪墨之恣睢愈甚按會典撫按公費出入一體互報存問私禮

乾坤正氣集

卷三百十九

三

通行禁革薦舉行謝者與受俱坐贓論今後兩院新舊之交當力  
敦古道禁絕折儀至于越境交餽驛驛自肥尤宜痛洗陋規毋爲  
識者譏訕其餘內外通問薦主舉主各存廉節之風莫冒饕餮之  
誚庶往來有道畔岸而人情無交相責聖之苦其留有餘以還民  
間者不旣多乎其次則議訪察按御史出巡第一要拿問奸貪蠹  
政害民之官至訪察土豪節經禁止先帝恩詔令撫按入境卽刊  
布奉旨施行訪察一條徧諭所屬以杜指嚇今各差弁髦明詔喜  
事督索非不意在戢奸而所司不善奉行每至搏擊榮備羅織富  
室日輕日濫但取完贓衙虎欣然奸民竊笑今後著爲定例止許  
巡按入境間一訪拿止用衙蠹豪奴不及鄉民止重罪遣枷號不  
追入贓其南北別差御史一槩不許行訪若果有豪惡巨窩必府  
縣據有實跡然後申報重創庶威行破柱而善良安枕乎其次則



議巡歷按會典偏僻州縣俱要一體遍歷如果地方廣遠亦要嚴督守巡依期巡歷蓋下邑叢壤日不見上官之威儀耳不聞朝廷之法令止驚胥尉之大第識縣官之尊剝肉亦且吞聲老死如在井底貪殘橫行何所顧忌合無申明舊例及近日御史魏光緒所奏出巡之日每府間至窮僻小邑一二處新舊更疊期于周遍仍減騶從躬節約守巡兩道不必並行陪巡其餘州縣責令兩道分道巡歷延見父老查驗倉庫毋拘時日至衢途有司結納過客曠廢民事朝夕送迎宜令堅一奉旨不許送迎木牌不問顯要衙門止許公署一見倘亦達民隱修職業之大端乎其次則議舉劾按會典御史出巡果係卓異官員方許舉薦方面多不過六七員有司多不過七八員其應劾官員須先大奸不許止以州縣府佐等官充數今薦額若賦方面如山但慮百足之扶誰念一路之哭卽

乾坤正氣集

卷三十九

三

濫借未登贖銀廣收合屬餽送殃民蠹政尙騰薦剝積俸挨資納汗藩牧今後各省巡按復命必糾司道府正一二人不得長奸避怨有司故違明禁誘迫生員里老人等舉保賢能者卽行參劾計令奸民鼓衆建祠者卽行拆毀庶勸懲明而實政舉乎至地方人材雖多格例相拘實亦消長所係清議可畏賢者倍加愆愼可也其次則議免覲按國初監司守令皆得召對面陳民間利病克當述職今堂簾日竣殿最不親營結輿援窺闕門戶呈身而上不厭偷行而衆不疑兼之輿從諸費何止數百萬金吸此民膏屑越可念沉撫按自有冊揭監司郡守見在質對州縣不至何礙勸懲前歲濟甯之變皆以縣令遠調乘隙蠢動今白蓮聞香餘孽未殄紅苗溥夷到處生心楚蜀有剝膚之憂秦晉切搗竿之慮吳越多伏莽之奸豈正官得解綬赴闕之日乎科道諸臣屢以爲言合無早



爲題明免其先事營營充入囊橐尤安民生清交際之第一義也  
夫法簡則嚴明則行法行則吏清而民受其賜御史有澄清天下  
之責臣等實居提挈紀綱之地焦心蒿目思挽頽波不敢不盡其  
愚獨念市恩易任怨難臣瑋申飭濫舉曾幾何時而賢者好篤緇  
衣諄諄推廣其說然臺綱憲體正直在忠厚之先國是朝常糾繩  
爲澄敘之本臣等竊願以身先之雖知罪不敢復計伏惟皇上俯  
賜採擇嚴旨叮嚀敕下臣院并各衙門一體遵奉施行天啟四年  
五月十九日二十二日奉聖旨御史巡方以察吏安民爲職這禁  
止私交濫訪及巡方舉劾等事依議嚴行申飭有違玩不遵的以  
不職參論免覲各官着先期題明憲臺紀綱重地卿等雅著風裁  
端本率先盡滌夙弊臻吏稱民安之理大計在卽還會同吏部一  
體遵行

乾坤正氣集

卷三十九

三

朝廷紀綱不可不惜謹據法糾參以祈聖斷疏

本科代掌院孫老先生草

臣等竊惟天下之治亂係于紀綱紀綱之振弛關於風憲故漢唐  
名臣有破貂璫之柱而避驄馬之行者非尊法官也尊朝廷也唐  
徐有功爲御史且曰陛下以臣爲法官臣不敢枉陛下法必死是  
官矣非死官也死朝廷之法也臣等叨居憲府申明舊章蒙皇上  
采而行之明旨告戒謂御史法官當爲朝廷守法臣等方凜凜紀  
綱之不立是懼而不意巡視北城御史林汝翥忽以擅責中使爲  
該監所參上干聖怒也又不意汝翥之畏罪避匿下灰士氣上違  
明旨也豈非二百餘年紀綱之地一大異事哉臣瑋伏枕聞之不  
勝駭嘆夫巡視之役臣等議改一年請旨差用以久其責任而重  
其事權將令之理論當道豈令其俛首中官第曹進等乘機生事  
罪應參送因其叩首乞哀薄責了事此何法也傳國興事如汝翥



言在曹進報名五人之內則參送之如國與言事止爭道則恕之乃一朝之忿漫然責治此又何心也汝翥先自廢法于是堂堂身史奉命肅清輦轂反爲內臣所參旣已辱西臺而負簡書矣御史有應得之罪則下臣衙門參看以彰皇上平明之治臣等敢不奉行今天威孔赫雷霆立下在汝翥一身生死孰非聖恩乃未爲強項之董宣先學逋逃之張儉毋論君臣之義無所逃于天地之間而使天下之人謂西臺有畏死之官玉階無碎首之節棄妻孥而弗顧委君命于草莽謂之何哉臣等先日聞之猶謂駕帖未下中使成羣長安街上蜂聚狼呼如捕反者二百餘年來不見此事故汝翥暫行引避徐束身以灑杖下之血不欲冒毒而死羣璫之手蓋引頸以望其出而今已兩日杳然如故其或自經溝瀆其或逃死關津皆不可知而總之非法也臣等方欲補牘而爭乞皇上開

乾坤正氣集

卷三十九

三

一面之網豈知裂維而去乃自干三尺之條今錦衣衛嚴行緝獲已奉明旨想旦夕之間必歸命于皇上臣等忝司法紀不敢不參伏乞皇上毋因此一事而遂廢巡城之法毋因此一人而遂侵風憲之權至廷杖九死一生毋遂視爲輕典并敕諭內監鈐束駕帖金吾職掌毋聽內使縱橫則羣臣服皇上之大法而亦感皇上之至仁矣風紀幸甚臣等幸甚天啟四年六月二十四日二十六日奉聖旨林汝翥已有旨了巡城御史戢奸安民堂上官當不時督察不得寬縱廢法亦不得苛擾地方這所奏知道了該衙門知道臺臣就逮國法尙存特懇恢宏聖度以重風紀以平政體疏

本科代學院

孫老先生草

臣等竊惟政猶水也平故不溢古之聖王仁義兼行官府一體不使法溢于情威溢于法何者懼其激而爭爭而潰非國家之福也



昨御史林汝翥被逮不出臣等實深憾之謂君命重則軀命輕鼎鑊可甘刀鋸不避設自經溝瀆死關津法度紀綱所傷不小故據法糾參嚴行分緝不敢冒昧申救然亦意汝翥執法自命不應終惜一死旦夕歸命紀法猶存昨接撫臣鄧漢咨文反覆所述汝翥揭帖慷慨流涕不過欲得代控之門明其義不死于羣罔之手而非敢逃死于皇上之法也夫伏法之疊臣在卽朝廷之法度在紀綱在皇上治以不卽赴命之罪臣等亦復何言惟是汝翥以管傳國典致觸聖怒杖御史一百以謝火者十五之笞法未稱平威亦少褻昨科臣公疏所引徽廟故事載內使許議等于邊調御史李學道于外徽猷如鏡芳躅可尋誠今日法祖第一義也臣等非爲一汝翥也念御史爲皇上耳目侍從之臣奉肅清輦轂之命而今以齒馬微嫌伏死杖下自後有憑陵氣燄魚肉官民者而無敢

乾坤正氣集

卷三十九

五

問也臣等亦非徒爲御史也從來南北司如水火漢唐之祚以此不振今半月之間廷杖者再皆命懸呼吸行道嗟傷屢遊杖下之魂時碧衰宏之血書之史冊謂國家養士二百餘年一旦以中官之故受殺朝士之名如皇上聖德何內臣卽不自愛亦當愛皇上堯舜之令名矣君威咫尺臣等不敢不據法糾參聖度如天臣等不敢不引義論列伏乞皇上少霽嚴威無頒行廷杖以損仁慈聖德或將汝翥發臣衙門參看重治其不卽赴命之罪取自上裁臣等不敢曲庇天啟四年七月初三日初六日奉聖旨朝廷法度憲臺首當遵守昨方糾參今文陳救且林汝翥不遵國法擅離職任弁髦王命悖旨通逃其原籍于南而潛逃東北定有別故本當遵會典從重鞫問姑從輕還着遵前旨廷杖一百棍革職爲民永不敘用該衙門知道



劾崔呈秀疏

本科代掌院  
高老先生草

臣惟御史回道考察憲綱至嚴也列聖之明旨皇上之申飭不爲不諄復鄭重邇復節經前後諸臣申明憲紀振飭臺綱一時賢者頗稱濟濟乃不意有慢視憲規恣行無忌者如巡按淮揚等處御史崔呈秀可異焉皇上不以臣爲不肖使長西臺豈非欲其是則是非則非無所媿阿隱默乎臣初入院適見兩御史回道一爲江西巡按謝文錦一爲崔呈秀臣心訝曰異哉兩御史一時回道一至清一至濁清濁較然臣不別白爲皇上明言之是不忠之大者也卽發河南道考察核無何該御史袁化中以所考察謝文錦者至臣卽以稱職考察奉聖旨謝文錦着回道管事欽此越二旬而袁化中始以所考察崔呈秀者至化中蓋有難於言者矣臣於去年奉差而出今年復命而入往來淮揚間所見淮揚士民無不謂自

乾坤正氣集

卷三十一

五

來巡方御史未嘗有如呈秀之貪汙者強盜地方大害也每名得賄三十金輒放訪犯地方大害也得賄千金輒放不肖有司應劾者多以賄無不薦薦者多以賄薦各御史出巡每有節省公費助國用者呈秀到處透支至一萬四千兩各縣賠補不勝其苦彰彰於地方耳目不可得而掩也至於舉核失真貪酷漏網則有兩淮運司同知譚天相在是呈秀所薦也呈秀甫離地方而按臣劉大受且臚列其贓私以入告矣則有霍邱知縣鄭延祚在是呈秀所薦也吏科都給事中魏大中且發其餽遺奉聖旨提問矣是賄而薦之實證也臣嘗竊歎人臣之負國實自負也受國家寵榮若何而所爲者不務於可榮皆流於至辱御史巡方寵榮極矣如呈秀者辱身辱國何如哉臣聞其知譚天相之貪欲論劾也天相稔知其易與奉之以千金求免劾而卒免天相益稔知其易與也又



奉之以千金求薦而卒薦則是搖山撼岳之威祇供其禦貨攫金之用而播間壟斷之賤且冒居觸奸指佞之官臣故謂其至辱所當重處以一洗廵方之辱也伏祈皇上速賜赦下吏部議覆施行天啟四年九月二十四日二十七日奉聖旨御史趙芳貪縱何以察史安民卿秉公考核執法糾彈具見振飭屬紀律是秀着該部看議來說

覆喬道長疏

本科代學院高老先生草

掌河南道監察御史袁化中呈奉本院判送刑科抄出巡按福建監察御史喬承詔奏爲麟祥普天同歡吉人及時宜用等事奉聖旨這本內解經邦點用經略憤恚推辭已經奉旨爲民安伸亦以規避貴州按差降處如何輒行奏薦朦朧市恩着都察院參看了來說欽此欽遵抄出到院蒙批發道奉此看得御史喬承詔吉人

乾坤正氣集

卷三百九

三

宜用一疏內之所薦者皆海內名流其扶正赤心已洋洋揭申但解經邦甘就衡門安伸原非規避二臣之事各有本末入告者自宜檢點胡急於憐才而形迹有所弗避也乎似宜俟其回道之時量行罰治者也等因呈覆到院該臣等看得人才之生培植實難掩瑕錄瑜主德乃大矧言事之臣爲明主錄用人才計者乎御史喬承詔疏中所列非白髮蕭蕭之元老卽丹心耿耿之孤臣本是滿朝之所共言亦屬聖心之所不棄數月以來如史記事李炳恭賀煇夏加遇荆養喬等無不拔自沉淪階子通顯而馮從吾特蒙簡用朝士彈冠其他以賜環請者皇上每日候旨行以示不忍終棄之意是皇上雨露之所濡日月之所炤旣已陰用承詔之言而諸臣亦第知歸美君父感德聖明未有追數其出於何人所薦者臣等有以知承詔之無恩可市也獨是解經邦推用而退避安伸



因差以爭論雖生平各有本末而去國原非無罪承詔於薦賢之中不宜遽及使過之說是誠龐雜而無章第御史言官也用賢盛事也承詔所薦賢者數十人誤舉者二人薦賢尙未蒙賞而誤舉先以示罰恐非所以作敢言之氣明如天之度也臣等爲皇上守法苟紀綱所在斷斷不敢曲庇若一時疎略語言小過敢爲乞恩于皇上之前以昭聖德以勸言者伏惟聖明垂察置其言之不當者用其言之當者將王紀鄒元標滿朝薦文震孟徐大相等及時錄用以不虛上天所以篤生賢才之意以不虛皇上所以愛惜賢才之心臣等不勝幸甚天啟四年十月初八日十一日奉聖旨御史奏薦不當奉旨參看何不分別糾駁且并薦及各官殊非政體喬承詔着奉候回道考察罰治該部知道

微臣奉命按秦略陳地方要務以祈聖鑒疏

代蔣澤壘年兄具草

乾坤正氣集

卷三十九

三

臣至愚極陋皇上不以臣爲不肖命之按秦陛辭有日矣凡臣等之啣命而出者皆以察吏安民爲事者也今民生日瘁吏治日偷風俗凋夷紀綱凌替益言巡方於今日實難而以言於秦尤難之難夫秦何地哉固山河百二所稱天府四塞之國也以天下之形勝蟠坻於秦秦實有雄據上游擁護神京之勢秦民安則天下皆安今秦何時哉塞外之虜情叵測邊鎮之庚癸頻呼徵調旣生草澤之心加派復剋哀黎之肉妖民屢見亂形漸萌若非前後兩按臣徒薪曲突則張善李天福輩其不爲徐鴻儒者幾希臣聞此輩實繁有徒而總繫於安民之吏吏得其人則民安民安則妖息而臣於是思天下之相臨者勢也上操之則重下操之則輕順布之則行倒授之則亂秦以天下極重之勢居極窮之會臣持斧以往不能有他諛巧不過仰藉皇上之威靈以糾察地方之吏而震悚



諸奸恣不法之魄今獨有三言預陳之期於必行使臣得操其勢之重以臨於吏民之上夫臣之所能者察吏也而不能擇吏卽有白簡之凝霜可使墨吏之解綬若欲推臣心以易不肖之肺腸則不能若欲分臣力以起衰殘之痿痺則不能頃披籍而求秦中州縣一百一十有奇僅得甲科七人卽入府中亦僅得其三秦亦仕國也不聞逐客之令何以裹足弗前如謂邊地早寒南人不習彼燕齊晉魏甲第如雲獨不可擇便而使乎旣鄉貢之盈地且頽敝之成風則吏議不得不寬不肖者有以自安而察吏之權其勢乃半操於下則多選甲科臣所願與吏部約者此也臣之所能者闕邊也而不能措餉卽將領之尅冒可綜核以糾參若荷戈乘障者啼饑而臣何以應若弭耳歎關者索賞而臣何以應今考成外吏之法嚴於徙木而邊鎮年例之欠等於望梅一旦驕虜悍卒喧喧

乾坤正氣集

卷三十九

三

而起內地奸民一呼響集我束手莫支而安危之權其勢乃倒授於賊則年例以時臣所願與戶部約者此也乃其大者則又望之皇上矣年來撫按之權日輕撓亂之門四出大吏敢於抗彈章藩王敢於抗明旨梟臣拂衣以去奸璫負嶠而居但知顧體面不惜廢紀綱爲按臣者一疏再疏而不行則巡方之勢去矣其如祖宗之法度皇上之簡命何哉臣旣任地方之責心則不敢不盡法則不敢不執其與地方相安者臣不敢苛刻以爲名其爲民生蠹賊者臣不敢容隱以滋蠹皇上不以臣爲不肖而命之則願終信此簡命而毋廢臣之官守是臣所仰望之於皇上者此也至若新推左布政使唐嗣美與閩黨逆可知公論之難容辱在彈文定是脂車之無路藩屏重寄九察吏安民之急詎可久據空銜以誤地方哉併祈敕下該部覆議施行



懇乞聖明軫念時艱明政刑以答天眷疏

臣惟天心仁愛人君自古而然未有昭明感格如我皇上者皇上以聖德而當冲年故天心倍爲眷祐旣發河清之瑞又呈鳳舞之祥而猶以聖志未定恐狃而安焉則疊出奴氛酋誣人妖物怪以警懼之而又以聖志方新恐疑而阻焉則前星早耀大祀居歆屆茲嵩呼萬國之辰卽降豐年六出之瑞此無他人心爲天心之本皇上一心尤天人心之本今四海之民雖脂枯髓竭而猶含酸飲泣以幾幸太平之樂者知我皇上清明在躬如日方升故人心繫屬而天心愈篤也孟軻有言國家閑暇及是時明其政刑今奴焰方滅首患未已草澤奸民海濱夷警憂時者日覺惛惚肆志者目爲閒暇然較遼廣失陷之候則少安矣詎非汲汲皇皇修明政刑之日哉乃中外諸臣粉飾太平之容窺矚穴中之鬪以體面

乾坤正氣集

卷三十九

五

爲養好之故套以推諉爲交關之法門講攘漸開同室之爭逢迎莫顧典冠之責甚者內臣欲之而大臣不敢爭大臣欲之而小臣不敢爭一人欲之而衆人不取爭又甚者內臣之所不欲而大臣不敢爭大臣之所不欲而小臣不敢爭一人之所不欲而衆人不取爭一陰再蔭一襲再襲添註之外又添註加銜之上再加銜藩王欲庇奸人則容之鎮臣欲握兵柄則予之諸臣之强者各飽其欲以坐觀而倦者亦各飽其欲以歸臥所長見廢棄者一二沐浴請討講學執法之名賢與夫批鱗折檻之直臣耳至於皇上之所欲則無一遂者皇上欲安民而民不得安欲滅奴而奴不得滅欲擒水藺二酋而二酋不得擒何也民之未安則巡撫有傳舍之思守令恣谿壑之欲監司曠縱而彈劾之風微吏胥橫行而鬻爵之途濫也巡撫邇雖多賢者無柰卿寺旣衆聚族而謀此欲得缺彼



乃速化惟是醫瘡剗肉之地乃淹某某瘴雨蠻烟之鄉乃置何士  
晉而守令激勸亦未有方不肖固在糾彈賢者非賂不顯監司空  
名占缺所在皆是如臣鄉蘇松重地道臣朱童蒙經年未見脂車  
常鎮道臣楊宏備兼攝兩篆席不暇煖勞者何所勸憐者何所警  
乎事例日開候選日衆丞尉動費千金屈官營營債債卑官瑣事  
撫按不屑搜訪及至敗露十一不過劣轉王官王官獨非名器乃  
爲不肖進階之地是何官制是何典章臣以爲欲行久任之法宜  
做漢璽書褒美之意如臣鄉豫江臣熊明遇之計擒逆宗府臣曾  
櫻吳麟瑞之計擒陳鼎相與臣江右所見九江道臣陸夢龍之計  
誅徐守糾以解散柯陳之隱亂及有開墾荒蕪拯救饑民清介特  
絕著有顯績者悉馳敕數行宣示褒美小者賜金大者加秩使人  
鼓舞競勸其監司違限半年者撫按年終類奏凡遇復命不得有

乾坤正氣集

卷三百十九

罕

舉無効每年進表及歲終復命報冊丞簿首領不肖者開註明白  
該部卽照考察事例叅題革職職多者提問尙亦察吏安民之一  
機乎乃若欲滅奴則機宜欲審而何以置樞輔爲孤注也夫戰守  
進止規畫布置察督撫之能否誅將帥之不用命此樞輔事也而  
治器械兵清伍核餉則撫臣事也提撥三輔撫賞西虜則督臣事  
也今若謂樞輔實掩撫臣之長而應受督臣之敗朝天無日滅賊  
何期黃閣皤皤直拘以經略之責則樞輔苦矣皇上試責問督臣  
撫夷之要領何在殺將之明效謂何近東奴假扮西虜探道喜峰  
此正呼吸不保之會應否聽指摘求去之撫臣耽延不去以悞封  
疆乃若欲擒奢安二酋先平黔蜀功罪張我續入蜀幾何時費餉  
百餘萬而疏報不滿二十萬督臣言之按臣列之臣同官霍瑛糾  
之科臣胡永順備數其貪橫之狀閱之令人髮指且其掩襲塘報



顛倒功罪反參處一力守危城之周著以還其咆哮之氣如此而不行逮問乃云敘功臣不知所敘者何功也李標多欲而揣被中人言土司之叛盡屬貪殘激之使然邦彥原有人心按臣德威可化而積怨深怒徒爲標發憤耳今藉按臣死守之功以掩罪是李維翰可以無罪而周永春可以無誅也林宰楊松年收伯賢勞開府是其分內京堂已爲平等而反以京堂爲酬功之典則何以勸捍圍之勞楊述中雖意見不同而勦撫本宜兼用謂宜明下一詔曰大兵所誅罪止安邦彥一人其安位母子忠順素著能擒賊自效土地人民悉以予之若邦彥能擒奢酋以獻貸其死如此則可散邦彥之黨而邦彥之勢孤可擄水蘭之交而奢酋之勢亦孤如必執意削地諱撫圍功使諸土司皆疑朝廷貪地不盡得不休卽安位母子亦疑而變志則黔蜀之患方始恐強弩之末不能穿管

乾坤正氣集

卷三十九

聖

竊臣愚未見王三善能立成破竹之功也且邦彥之撤圍獨畏黔力哉粵撫先震之以虛聲而黔乃乘其敝今乃以神功靠三善卽五十萬餉空名畫餅何日取盈乎滇之有鎮臣也非國初比也撫按之不足任而以授黔責鎮臣鎮臣之不足任而以兵柄付悖逆之沐啓元彼中如湯火迫身而廟堂終無變計滇之禍又豈在黔下哉夫定封疆之大計不可參以同異之私心振蠹蔽之積習不可牽以文俗之情面元輔三朝元老應爲皇上主持於內調護於外至擇吏以安民則冢臣能任之臣知冢臣之徹底無欲而終望其無爲其所不爲飭紀以清蠹則樞臣能任之臣知樞臣之直前有爲而終望其無欲其所不欲皇上嘗保此清明之心獨伸於陰翳之上受惜名器而蔽袴之不輕容納直言而賜襲之不吝念念在於恤民窮卽念念可以承天眷否則本源一糴而衆欲攻之恐



天之所以警懼皇上者又將至矣圖之豈有及哉

乞廣收名賢之用以培正氣疏

臣惟治亂之數相循環而一以君子之聚散爲候蓋君子聚則小人散矣君子之勢落落然聚而若散則小人之氣炎炎然散而欲聚矣力薄者易搖根深者難拔用人者于此譬如奕然先有全局精神滿盤打算便須着着接手路路不差乃免倉惶錯應之患未有得一勝着遂可示人以暇者也年來柄國之臣外託調停陰除異己深營窟穴假手宵人于是人以官爲遷廬官以官爲情面一缺之出姑甜予攘攫之人一人之捱又費盡糾彈之墨卽如會推司空之日共聽乞憐之言開門一揖盜反爲主所謂兩月虛名今且頑然不動何也人第知握要之處長貳一一擇人不知卿寺之階地位忽忽相逼方謂薰蕕不妨並進俄而踞高位如山矣方謂

乾坤正氣集

卷三百九

望

牛驥可以同曹俄而覬覦津如鴛矣昨總憲無恙人皆晏然一旦按圖更索不免躊躇四顧然後嘆名賢在野畢竟空賒老臣在前舉須後勁當此莽伏難除讒說未殄君子之力不厚則小人之膽畢張萬一進一匪人豈不全局俱覆今元輔丰采方新正宜爲皇上進賢退不肖豈得再守前人之故轍老白駒于空谷哉夫春秋之義矢同心以討賊者此其人並關天意誠未易言若折檻之直臣固可以力爭也掛冠之司寇固可以誠動也況乎馮從吾余懋衡曹于沐三臣者或小人陰阻其用而皇上原未嘗不用或皇上偶以意爲用而諸臣不肯輕用以善成皇上之用繇今而思從先守道力砥百折之狂瀾拂袖還山卒寢點陪之流弊此而越在留憲及冥若翔鸞朝宇終覺無光人心亦爲不悅而臣更有感于劉宗周劉洪諫之去也彼其丹心未老白璧可懷清豈潔身恥將礪



俗始知妬婦之側原有不肯乞憐之貞心而壟斷之場亦有不愛爵祿之孤韻臣願皇上亟詔主爵召諸臣而大用之以明示天下則媒孽正人者一破其黨錮之深謀播弄與援者自寒其乞靈之邪魄而不特此也以一君子爲衆君子之宗盟則東西何至于易面以真君子爲僞君子之鍼砭則左右何至于占風嗟乎富貴有盡日月尙長臣願諸臣少醫羶逐之忙略破怨尤之想毋暗中挑激如蠅之成聲毋明肆擠排如蛾之赴火人心靜而政體平聚者庶可以無散不然調停眼下揣摩局中君子之交日分小人之黨愈合所謂不終朝之計臣未見其可也

直剖積疑之根共消相傾之習以尊主權以彰聖德疏

臣惟人主之喜怒猶天之有雨露雷霆也淫雨震霆有時不節而人無敢疑其私者天之司吏奉天之令原無私喜怒于下土之人

乾坤正氣集

卷三十九

聖

卽巫祝與妖憑附土木誰惑黔首厚誣神明而欺天不已終必殛之其于天德何損焉我皇上固天縱之聖也宵衣臨御赫赫明明遜志講筵乾乾惕惕卽如科臣傅櫬一疏再疏無不響應舉朝正切駭嘆聖心已見轉圜蓋同文之獄旋罷可以觀仁諳恕之行忽止可以觀明風雷之變立收可以觀武聖心無我大柄不移一舉而三善備焉左右之臣如魏忠賢者誠未至憑藉寵靈如二正之季乃邇來章疏此亦曰中旨彼亦曰中旨群情未鬯臣竊怪之夫所謂中旨者必其纖毫無與于外廷而突從內降者也繇今觀之大有不盡然者一事也皇上固廓然大虛卽左右恩怨難忘朽骨久應心冷亦何苦葛藤不了首發難端而無如言者之善逢也因而唱其所甘因而剪其所忌危詞所臧立見霜飛搖手相招忽開齊色故諸臣之疑非疑其從內出而疑其從外入者也此臣所謂



積疑之根明主不可不知者一人也皇上方拔茅連茹卽左右骨  
鯁是忌明義猶自凜然亦何苦水火相煎身爲鳴鏑而又無如言  
者之善借也因而鋤當戶之蘭因而射雙鵬之箭猩猩有血音貨  
可居佺鬼爲孽一網俱盡蓋已試之法一見于邵輔忠而再見于  
孫杰者也此臣所謂相傾之習明主不可不知者也夫年來敗局  
同類相傷或尙氣猶可消融惟患失無所不至今聖明在上蕩蕩  
平平本無猜嫌有何桎梏而三四奸人如貲郎弁流周親僞族皆  
欲報復恩怨播弄是非遂使言者入其彀中不覺走險如鶩原其  
初心亦豈至此迨機事已破清議難容外實快其黨同伐異之私  
內乃受其作威作福之謗于是重煩天語曲解猜疑屢褻王言諱  
稱旁落一則曰鬪票一則曰朕裁蓋合内外之臣諉過于君父而  
聚衆流之派畢納于江河聖德旣略晦其光而主權亦微損其重  
乾坤正氣集

卷三十九

器

人人以中旨爲口舌而莫肯昌言其故此臣所以扼腕太息也然  
則皇上今日所以收主權而顯聖德者無他亦曰仁以覆之而已  
毋以立法之初心傷好生之大德亦曰明以燭之而已毋以先入  
之單詞奪舉朝之公論亦曰武以斷之而已毋以狐疑而不決致  
衆口之煩興并乞戒諭內臣魏忠賢善守身名保全富貴毋聽外  
人之煽惑辜負聖主之恩私再乞戒諭言路諸臣洗滌肺腸同心  
戮力毋受細人之挑弄目起回室之戈矛然後疑者化傾者平謂  
猶有以中旨之故紛爭不已者臣不信也

請明是非以釋羣疑以定衆志疏

臣惟孟軻有言是非之心人皆有之是心也衆著之爲國是獨握  
之爲王章古聖王以枉直衡舉措以功罪明賞罰昭昭乎揭日月  
而行苟無是非雖堯舜不能以治天下其後一變而爲清議再



變而爲調停君子與小人爭是非小人與君子爭勝負君子之勢常負而不以掩其是小人之勢常勝而莫能飾其非清議重而政事輕已非國家之福迨調停重而清議亦輕寘寘焉波靡局轉子是乎是非之衡日亂而賞罰之用不尊臣愚以爲定是非者欲公行是非者欲斷然後是非之權常在上而不在下昨科臣傅櫪之攻臣堂官左光斗及科臣魏大中也是一疏而與詔獄再疏而誥朝儀三疏而及寬政豈櫪之緊着鬆着次第原有安排抑殺機生機平日不無轉念臣皆弗能知要自皇上臨御以來叩關排闥未有轉圜如此之捷握契如此之微者也諸臣公疏單疏屢奉明旨日心跡旣明日公論自明而吏部鄒維璉等三臣皆着到任供職似諸臣是非之案已定矣乃明旨汲汲自爲剖分不日有何旁落則日不得猜疑皇上威福在手何敢疑大權之旁落而外廷揣摩以

乾坤正氣集

卷三十九

聖

迹終不能疑城之洞開卽如被參私人一曩居狂狷之中一晏然兄弟之好恩威之異用則疑批答章疏或朝上而夕下或經旬之停閣遲速之不測則又疑傳櫪再參之疏原與甄淑等公疏同日奉旨而淑疏不妨于到任櫪疏以爲當杜門使人臣進退之無據則又疑疑與疑相生訛與訛相襲甚至謂神奸交構將鍛鍊同文之獄又有謂計成遲局爲操縱箝口之方人言籍籍臣萬萬信其必無然疑根一日不去則羣鷲一日不息羣鷲一日不息則國是一日不明人心之是非雖有不氓之眞而聖斷之遲迥終屬未了之案莫若以票擬聽之閣臣以主持歸之部院以清議公之臺省外廷共平其是非而內廷無與焉聖心獨斷其是非而左右無與焉是非之辨旣分清明之象立見然後疑者釋鷲者止皆曰皇上威福自操果無旁落之端也如此內臣盛滿善居果無外交之迹



也如此所以光明聖德保全和氣豈獨爲光斗大中二臣之進退已哉夫臣之所請于皇上者無他言卽傳櫬顯明其道之言也櫬不幸有其迹故急欲避其名櫬万欲避其名愈無解于其迹皇上誠行其言顯明其道毋使人揣摩于真寘之域則櫬亦有以自解于天下而臣且與之游于無偏無黨之天又何求焉臣草疏已畢又見冢臣趙南星具疏乞休皇上試思冢臣正直無私求賢如渴居位幾何時用人幾何事鬱鬱思去感觸何因且元輔忠誠聖鑒方堅拂袖之思樞輔憂勞社稷又動乞骸之想老臣去就世道攸關是非混淆仁賢色舉則皇上今日眷留輔臣冢臣尤明是非之第一義也臣無任悚息待命之至

乾坤正氣集

卷三十九

吳

09972



